

Herremättli-Clique 1982

Sujet:

Haimweh Oder s'druurig Lied vom Basilisgg

Ort vo dr Handlig:

E Amtsschtube irgend naime z'Basel

Aawäsendi Persoone:

Ai Holzkopf (sicher)

vilicht none Holzkopf (nit sicher)

vilicht no mee Holzkepf (au nit sicher)

Aine wo usgseht wie e Hyffeli Eländ und
sich vorkunnt wie e Gloon

Ai Basilisgg

Dr Laitschspruch vom Holzkopf isch:

"Was nyt koschtet, isch nyt wärt!"

Dr Täggscht isch frei erfunde und
irgend e Aehnlichkait mit läbende Persoone
isch sälbverschändlig rain zuefellig und
ganz sicher kai Absicht.

Dr Basilisgg bättlet, dr Bligg isch trieb:

"I mach kai Drägg, bi immer lieb,
i speii kai Fyr und will nit schpringe,
verschregg kaini Lyt und due nit singe.
I will au kaini Kinder bisse,
au s Trottoir will i nit verschisse,
au will i gar nit Grossroot wärde,
fiehr gege niemer e Beschwärde.

Uffs Määrli verzelle will i verzichte,
die kas Trudi Gärschter dichte,
i will au nit d Regierig stirze,
dr Finanzplan will i au nit kirze.
I will nit händle, randaliere,
fyr s AJZ nit demonschriere,
i will nyt z Aesse und nyt z Dringge,
will au niemer haimlig gingge.
Dr haissischt Summer macht mer nyt
und au im Winter wär i fit,
i wurd schtill vor mi ane deese
und ab und zue e Kryzzi leese.
Au wenn sie uff mer umme glättere
wurd i ganz bischtimmt nit wättere,
si kennte an mer umme rysse,
uff e Schwanz mer trampe, in d Nase bysse,
vo unde här am Buuch mer kratze
und Neegel schnyyde an de Tatze.
I wett au nie dr Lai go danze,
au nit emol in d Schtadt go schwanze.
Numme ai Wunsch hätt i...no däm Gfasel,
ändlig, ändlig hai no Basel."

Do maint dr Holzkopf hinterem Disch:
"Do inne wirds mer langsam z frisch.
Mached s Fänschter zue, s goht dusse Byse.
Und dä do wärfe mer zem alte Yyse."

Am Fasnachtszyschtig vo demorge am nyini bis
znacht am elfi und am Mittwuchmorge vom
nyini bis am elfi goht me in d'Muschtermäss
an d'Ladärne-Usstellig.